

Carta Cha Xihna Ri Sacuhun Ra Apóstol Pablo Chi Náyivi Nuu Tesalónica Cha Yihí Cuenda Nyoo

Nu tyaag ra Pablo ta ra tahan ra
noo tutu chi ñu yihí cuenda Nyoo

1 Yuhu ra Pablo chihin ra
Silvano ta ra Timoteo, tyaá ndi
tutu ihya chi ndo cha cuví ndo ñu
yihí cuenda Nyoo ñuu Tesalónica
chiña. Vatyí ñin ri cuví ndo chihin
Nyoo Sutu yo ta chihin Sutu Mañi
yo Jesucristo. Ta Nyoo Sutu yo ta
Sutu Mañi yo Jesucristo na nasoco
ra chi ndo. Ta na cuhva ra cha coo
cha taxi ri añima ndo.

**Vaha xaan chinó ñni ñu
Tesalónica cuan chi Nyoo**

²Tyicuan ri nacuhvá ndi tyahvi
nyoo chi Nyoo cha cuenda tandíhi
ndo. Ta nyita ri chicán tahvi ndi
cha cuenda ndo. ³Tyicuan ri yihí ñni
ndi tuhun ndo nuu Nyoo Sutu yo
ta nichón ñni ndi vatyí ñni ñni ndo
chinó ñni ndo chi Nyoo ta sacuví
ndo tyiño nuu ra. Ta ñihi sahá
tyiño ndo cha cuenda cha cuñí ndo
chi ra. Ta chihin cha ñni ñni ndo yihí
ñni ndo cha cuañihi ndo cha cuenda
ra Jesucristo. ⁴Vatyí chitó ndi tyi
Nyoo nacachi vaha ra chi nyoho

yañi. Ta cuñí xaan ra chi ndo.

⁵Vatyí quivi cahan ndi tuhun Nyoo
yoso caa sacacú ra añima yo chihin
ndo, ñima chihin tuhun yuhu ri
cahan ndi, soco tyinyee xaan Tatyí
li chi ndi, ta cuaha xaan sacuvi
ra chihin tunyee ñni ra. Ta cahan
ndi chihin cha chitó vaha ndi tyi
tuhun ndicha Nyoo cuví. Ta nyehe
vaha ndo yoso caa chiyo ndi quivi
chinyaag ndi chihin ndo. Tyicuan
caa chiyo ndi cha cuenda cha vaha
chi maa ndo.

⁶Ta quichaha iyó ndo cuhva iyó
ndi, ta cuhva iyó Sutu Mañi yo.
Vatyí natiñ cuenda ndo tuhun
Nyoo, vasi cuaha tindoho nyehe
ndo cha cuenda cuan. Soco sií
xaan cuñí ndo vatyí maa Tatyí li
chahá tusiñ ñni cuan chi ndo. ⁷Ta
cha tyicuan caa, tyinyee xaan ndo
chi tandíhi ñu yihí cuenda Nyoo
nicahnu ityi Macedonia chiña ta
nicahnu ityi Acaya ihya ñandíhi,
vatyí nyehé ñu cuhva iyó ndo
chihin Nyoo. ⁸Ñima ityi Macedonia
ta Acaya ri, soco tandíhi ri ityi nu
chiñí ñu tuhun ndo chitó ñu tuhun
Sutu Mañi yo ta chitó ñu vatyí

chinó xaan iñi ndo chi Nyoo. Ta yucuan chaha nyacua ña niñi ca cha cahan ndi tuhun Nyoo chihin ñu. ⁹Vatyí suri maa ñu nacatyí ñu chi ndi yoso caa cha vaha xaan tiin cuenda ndo chi ndi quivi cuan. Nacatyí ñu yoso caa sandihi ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha. ¹⁰Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andivi. Ican ra cuví ra cha sanandotó Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quivi sacutuñi ra chi ñáyivi.

Tyiño sahá ra Pablo ñuu Tesalónica

2 Nyoho yañi, chitó ndo vatyí ñima cha caha ri chahan ndi chicahan ndi tuhun Nyoo ñuu ndo. ²Vatyí chitó ndo yoso caa nyehé ndi tindoho saha ñáyivi ñuu Filipo cha ni cumañi ca chaq ndi ñuu ndo. Ta vasi nyehé xaan ndi tindoho ñuu cuan soco quivi chaq ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyivi ñuu ndo, soco tyinyee xaan Nyoo chi ndi ta sacotó ndi chi ndo yoso caa sacacú ra añima yo. ³Vatyí tuhun cha chahq ndi chi ndo maa maa ri cha ndicha cuví. Ta ñahri cha quíni caa chicá xiñi ndi. Ta ni ñima cha cuñí ndi sandavi ñaha ndi chi ndo. ⁴Ñahri cha ña vaha cahān ndi, vatyí Nyoo nyehé ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra añima yo. Ta yucuan cuví cha cahán ndi tari cuhva tyatyíño ra

chi ndi. Vatyí ña cuñí ndi cuvaha ndi nuu ñáyivi, soco nuu Nyoo cuñí ndi cuvaha ndi, vatyí maa ra nyehé ra ñáá cha caa añima yo. ⁵Ta nyoho chitó ndo vatyí ni noo chaha ña cahān ndi chihin tuhun tyaquí cha cuñí ndi sandavi ñaha ndi chi ndo. Ta ni ñima cha cuñí ndi saha ganaa ndi xuhun ta cahān ndi tuhun ihya chihin ndo. Nyoo cuví ra cha ndaa tyi ndicha cha cahín ihya. ⁶Ta ni noo chaha ña nanducú ndi cuhva cha sacahnu ñáyivi chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyi maa ra Cristo tachí ra chi ndi, soco ña cuñí ndi coso ndi siqui ndo cha tyicuan caa. ⁷Soco cuñí ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñí ndi tyinyee ndi chi ndo. ⁸Cuñí xaan ndi chi nyoho, ta cahvi iñi ndi vatyí ñima tuhun Nyoo ri cuhva ndi chi ndo, soco nyacua nya ñayivi ndi ñandihí, cha cuenda cha cuñí ndi chi ndo. ⁹Nyoho yañi, nicohón iñi ndo yoso caa saha tyiño ndi quivi chinyicú ndi chihin ndo. Sahá tyiño ndi ñicahñu ta cha cuaa vatyí ña cuñí ndi coso ndi siqui ni noo ndo cha ni ri ca cha cahán ndi tuhun Nyoo chihin ndo.

¹⁰Ta nyoho cuví ndo cha ndaa, ta Nyoo ñandihí, vatyí maa ri cha vaha ta cha ndaa chinyacuví ndi quivi chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñí Nyoo chinyacuví ndi, ta ña chahq ndi cuhva vatyí cahan ña vaha ndo siqui ndi. ¹¹Ta chitó tucu ndo yoso caa sandunií ndi iñi noo noo ndo chihin tuhun chahq ndi

chi ndo. Sandunyeē ndi iñi ndo tari noo ra chihin sehe ra. ¹²Ta catyi ndi chi ndo nacachi coo ndo tari tahán chi coo ñu yihí cuenda Nyoo. Vatyí maa ra nacana chi ndo vatyí coo ndo nu nyacá ñaha ra, ta nyehe ndo cha tyaqui gloria ra.

¹³Yucuan chaha tyicuan ri nacuhvá ndi tyahvi nyoo chi Nyoo, vatyí quívi chiñi ndo tuhun ra cha cahan ndi chihin ndo, natiin cuenda ndo vatyí nacoto ndo tyi tuhun Nyoo cuví ta ñima tuhun ñáyivi ri. Ta ndicha cha tuhun Nyoo cuví, vatyí sacuvi chi vatyí chino iñi ndo chi Nyoo ta nasama ndo cuhva iyó ndo. ¹⁴Yaha cuan ta nyehe tucu maa ndo tindoho saha ñáyivi ñuu ndo, tari nyehe tucu ñu yihí cuenda ra Cristo Jesús nicahnu ityi Judea. Tyicuan caa sanyehe tucu ñu Israel ityi Judea cuan tindoho chi ñáyivi tahan yo cuenda ra Cristo cuan. ¹⁵Ta ican ñu Israel cuan cachahñi chi Sutú Mañi yo Jesús tari cachahñi tucu ñu chi ra profeta, ra cachaha cuenda tuhun cahan Nyoo ta ityi chata ca. Ñu Israel cuan tava ñehe ñu chi ndi. Ñima cuhva cuñi Nyoo iyó ñu. Ta tasi cuñi ñu nyehe ñu chi tandihi ñáyivi. ¹⁶Tatu cuñi ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahan ndi, cucuaha ca cuatyí ñu. Ta vityin nu ndihi tuhun cutachi tuñi xaan Nyoo chi ñu.

**Nu catyi ra Pablo vatyí cuñi
ra cunyehe ra nu nyicú ñu
Tesalónica inga chaha**

¹⁷Yañi, cha yaha cha quitá ndi ñuu ndo vasi ña naha nyehe ndi

chi ndo soco ñohó xaan iñi ndi chi ndo. Ta chihin cha ñi iñi ndi cuñi ndi cunyehe ndi nu nyicú ndo inga chaha. ¹⁸Ta nducu ndi cuhva cuhun ndi soco ña cuví. Ta yuhu ra Pablo ñandihí, cuaha xaan chaha nduqui cuhva cuhun ndi, soco tahan ri chaha cha cuñi ndi cuhun ndi ta ña chaha ra ña vaha. ¹⁹Soco ýóó chi ita iñi ndi? Ta ýóó chi cuenda cusii cuñi ndi, ta vaha cuñi ndi? ¿Atu ñima cha cuenda maa ndo cusii xaan cuñi ndi nuu Sutú Mañi yo Jesucristo quívi quichi ra inga chaha? ²⁰Vatyí cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sii xaan cuñi ndi cha cuenda cuan.

3 Ta yucuan chaha ña cunyeē que cha ma cote yoso caa cuahan ndo chihin Nyoo. Ta natyai iñi tyi ndoi ñuu Atenas. ²Ta tachí chi yañi yo ra Timoteo na cuhun ra cunyehe ra chi ndo. Maa ra sacuví ra tyiño nuu Nyoo vatyí iin ri chihin ndi cahan ra tuhun yoso caa cacú añima yo sahá ra Cristo. Tachí ndi chi ra nu nyicú ndo na sandunhi ca ra iñi ndo ta sandunyeē ca ra iñi ndo tacuhva vatyí chinó ca iñi ndo chi Nyoo. ³Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindoho. Vatyí nyoho chitó ndo vatyí nyaá yo cha nyehe yo tindoho tyehe caa. ⁴Vatyí ta ninyaá ca ndi chihin ndo, catyi ndi chi ndo vatyí cha cuñi quichi quívi cha nyehé yo tindoho. Ta chitó vaha maa ndo tyi tyicuan caa cuví. ⁵Yucuan chaha ña cunyeē que cha cuñi cote tuhun ndo. Ta tachí tyiño chihin ra Timoteo na

nyehe ra yoso caa cuhva cuahan chinó iñi ndo chi Nyoo. Vatyí yuhví coto sandavi ñaha cuihna chi ndo ta nandihví tucu ndo nu quiñi caa inga chaha. Vatyí tu tyicuan caa, cucunaa tandihí tyiño saha ndi nu nyicú ndo.

⁶Soco vityin cha nachaa ra Timoteo cha chahan ra nu nyicú ndo ñuu Tesalónica chiña. Ta nacatyí ra chi ndi vatyí ñí iñi ndo chinó iñi ndo chi Nyoo. Ta cuñí xaan ndo chi tahan ndo. Ta catyí ra tyi tyicuan ri nicohón iñi ndo chi ndi ta cuñí xaan ndo nyehé ndo chi ndi, tari nyuhu, cuñí tucu maa ndi nyehé ndi chi ndo. ⁷Yucuan chaha, yañi, vasi cuaha cha cuví chi ndi ta nyehé ndi tindoho, soco vaha xaan cuñí ndi cha chitó ndi vatyí nyoho vaha chinó iñi ndo chi Nyoo ta ña sañá ndo chi ra. ⁸Tari quiví cha nduchaa ñayiví ndi, cuñí maa ndi cuhva cha nacoto ndi vatyí nyoho ñihi cuahan ndo chihin Nyoo. ⁹Nyacua ña ñihí ndi cuhva nacuhva ndi tyahvi nyoo chi Nyoo cha cuenda ndo. Vatyí sii xaan cuñí ndi nuu Nyoo cha cuenda vatyí vaha cuahan ndo chihin ra. ¹⁰Chicán tahvi xaan ndi chi Nyoo ñicahñu ta cha cuaa, vatyí cuñí ndi cuhun ndi cunyehe maa ndi chi ndo. Tyicuan ta cuvi sandunanií ndi cha chinó iñi ndo.

¹¹Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cuhun ndi nu nyicú ndo. ¹²Ta na tyinyee ca Sutu Mañi yo Jesucristo chí ndo tacuhva cuñí ca ndo chi noo noo tahan ndo ta chí tandihí ñáyivi tari cuñí nyuhu chi nyoho. ¹³Tacuhva

vatyí cunii ca iñi ndo ta cunduvii ndihí añima ndo. Ta ma coo ca cuatyí ndo nuu Nyoo Sutu yo quiví quichi tucu Sutu Mañi yo Jesucristo chihin tandihí ca ñu yihí cuenda ra.

Cuhva cha tahán iñi Nyoo cha coo yo

4 Vityin yañi, chacú ndahvi ndi nuu ndo ta chahá ndi tuhun chí ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chí ndo, cuhva tahán iñi Nyoo. Ta sañihi ca ndo coo ndo tyicuan caa noo noo quiví.

²Nyoho cha chitó ndo yoso caa chaha ndi cuhva chí ndo tari chaha tucu maa Sutu Mañi yo Jesús cuhva chí ndi. ³Cha cuñí Nyoo, ican cuví ihya: Cha ñacuhva ndihí ndo chí ndo chí ra tacuhva sanduvii ndihí ra añima ndo. Ta ni noo ndo ta ma coo ndo chihin noo ñaha sihi o rayíi tatu ñima ñasihi o yíi ndo cuví. ⁴Ta tahan tahan ndo cuñí chí coto ndo yoso caa coo ndo chihin ñasihi ndo. Coo vii ndo chihin ña chihin cha cuñí ndo chí ña. ⁵Ñima chihin cha quichi cuvi iñi ndo cha quiñi caa tari nyacuví ñáyivi cha ña ñohó nuu chí Nyoo. ⁶Ta ni noo ndo ta ma sandavi ñaha ndo chí yañi ndo ta coo ndo chihin ñasihi ra. Vatyí Sutu Mañi yo, ñihi xaan tachí tuñi ra chí ñu sacuví tyicuan caa, tari cuhva catyí ndi chí ndo. ⁷Vatyí Nyoo nacana ra chí yo vatyí tacuhva sacuvi yo cuhva cuñí maa ra, ta ñima noo cuhva quiñi caa. ⁸Ta yucuan chaha yóo ñu cha ña cuñí tyasoho tuhun ihya, ñima tuhun ñáyivi ri ña tyasohó ñu, soco tuhun Nyoo ña tyasohó ñu. Vatyí

suri maa Nyoo chaha ra Tatyí li ra chi ndo. ⁹Soco tuhun cha cuñí yo chi tahan yo, ña chiñuhú cha tyai nu tutu ihya tuhun cuan. Vatyí suri maa Nyoo cha sañaha ra chi ndo vatyí cuñí yo chi tahan yo cuenda Nyoo. ¹⁰Ta tyicuan caa cuñí ndo chi tandíhi tahan yo nicahnu Macedonia chiña. Soco chacú ndahvi nuu ndo yañi, vatyí na cuñí ca ndo chi ñu noo noo quívi. ¹¹Nducu ndo cuhva coo vii ndo. Ta ma tyíhi ndo chi ndo nu ña tahán chi, soco ñin ri tyíño maa ndo caca xiñi ndo. Ta saha tyíño ndo chihin ndaha ndo tari cuhva catyí ndi chi ndo quívi cuan. ¹²Tyicuan caa sacuvi ndo tacuhva vatyí ñáyivi ña ñohó nuu Nyoo cuasaha ñu ñáyivi chi ndo. Ta ñahri cuacumañi chi ndo.

**Yoso caa cucuvi quívi quichi
Sutu Mañi yo Jesús inga chaha**

¹³Yañi, ña cuñí ndi cha ma coto ndo ñáá cha cuví chi ñáyivi chihí, vatyí coto nducuihya ñi ndo tari nducuihyá ñi ñáyivi cha ma tahan chi nyehe chi Nyoo. ¹⁴Ta tari cha chinó ñi yo vatyí chihí ra Jesús ta nandoto ra, tyicuan caa chinó tucu ñi yo vatyí Nyoo cusanandoto ra chi ñu ndiyi cha chinó ñi chi ra.

¹⁵Yucuan chaha catyí ndi chi ndo tari sañaha Sutú Mañi yo chi ndi. Vatyí yoó cha nyitó yo nyacua nya quívi quichi ra, ñima xihna ca yo cuhun ican saha ñu cha yaha chihí. ¹⁶Vatyí suri maa Sutú Mañi yo cunoo xica ra andiví, ta cucana chaa ra vatyí maa ra cuví ra nyacá ñaha. Ta cucana chaa noo ra cuví nuu chi ángel. Ta cunativí

trompeta Nyoo. Tyicuan ta ñáyivi cha yihí cuenda ra Cristo ta chihí ñu, xihna ca ñu cunandoto. ¹⁷Yaha cuan ta yoó cha nyitó ca yo cundaa xica yo ñin ri chihin ñu nu vico, nu cunañihi tahan yo chihin Sutú Mañi yo ityi andiví. Ta yucuan ta cucunyaa yo chihin ra tyicuan ri maa. ¹⁸Yucuan chaha sanduni ndo ñi tahan ndo chihin tuhun ihya.

5 Soco ama o ñáá quívi cucuvi tuhun ihya, ña ñiñi cha cahin tuhun cuan chihin ndo yañi. ²Vatyí cha chitó vaha maa ndo vatyí ma tuvi ri ñi yo ta cuchaa quívi quichi tucu Sutú Mañi yo. Vatyí tari cuhva quihvi noo ra suhu vehe ñáyivi cha cha cuaa, tyicuan caa cucuvi. ³Vatyí quívi cha catyí ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana ñi ñu ta quichi tindoho cuan siqui ñu. Tari noo ñaha sihi cha cuacacu sehe, sana ñi ña ta quihvi cha uhvi chi ña. Ta tyicuan caa cucuvi chi ñáyivi quívi quichi Sutú Mañi yo, vatyí ma cuvi cono ñu. ⁴Soco nyoho yañi, ñima ca nu ñaa ñi nyicú ndo ta catyí ndo vatyí sana ñi ndo ta cuchaa chi quívi Sutú Mañi yo, tari sana ñi ñáyivi tatu quihvi ra suhu vehe ñu. ⁵Vatyí tandíhi yo chitó yo yoso caa tahán chi coo yo vatyí Nyoo sandundichin ra añima yo, ta ña iyó ca yo nu ñaa ñi tari ñu ña ñohó nuu Nyoo. ⁶Yucuan chaha ma cuvi yo tari inga ñu cuan. Tari quívi cha quixí ñu vatyí ña quichahá ñu cha ndichi Sutú Mañi yo. Soco yoó cuatu tuhva yo ta cachi coo yo. ⁷Vatyí ñu quixí, quixí ñu cha cha cuaa, ta ñu chihí xaan ndixi, chihí ñu cha cha cuaa.

⁸Soco yoó cha cuví yo ñu cuenda cha ñicahñu, nacachi cõo yo. Ta tari noo sindaro sahá ra cuenda chi ra chihin noo cha tyaá ra pechu ra, tyicuan caa saha yo cuenda chi yo chihin cha ñi iñi yo chinó iñi yo chi Nyoo, ta chihin cha cuñí yo chi tandihi ñáyivi. Ta tari sindaro sahá cuenda ra xiñi ra chihin noo caa, tyicuan caa cuñí chi cha sahá yo cuenda chi yo chihin cha yihí iñi yo tyi cacu yo. ⁹Vatyí Nyoo ña tyaa ra cuhva chi yo vatyí tachi tuñi ra chi yo, soco nacachi ra chi yo vatyí cacu yo cha cuenda Sutu Mañi yo Jesucristo. ¹⁰Vatyí ra Jesucristo chihí ra cha cuenda yo vatyí tacuhva coo yo iin ri chihin ra. Ñahri saha vasi cha chihí yo o iyó ca yo, soco tandihi yo coo yo iin ri chihin ra. ¹¹Yucuan chaha sandunií ca ndo iñi tahan ndo ta sandunyeec ca ndo iñi ñu, tari cuhva cuahan nyacuví ndo vityin.

Nu chahá ra Pablo tuhun chi ñu

¹²Soco yañi, chacú ndahvi ndi nuu ndo, na saha ndo ñáyivi chi ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chi ndo. ¹³Cuñí chi cha saha xaan ndo ñáyivi chi ra chihin cha cuñí ndo chi ra. Vatyí sacuví ra tyiño Sutu Mañi yo. Ta vaha cõo ndo chihin tahan ndo cuenda Nyoo.

¹⁴Ta tyatyíñó ndi chi ndo yañi, vatyí cuhva ndo tuhun chi ñu cha ña cuñi saha tyiño. Ta sandunií ndo iñi ñu cha ña ñi ca iñi. Ta tyinyee ndo chi ñu vita cuñí vatyí ta chino vaha ca iñi ñu. Ta cucama iñi ndo chihin tandihi ñáyivi.

¹⁵Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihi ñáyivi.

¹⁶Tyicuan ri cusii cuñi ndo. ¹⁷Ta cacan tahvi ndo tyicuan ri maa.

¹⁸Nacuhva ndo tyahvi nyoo chi Nyoo cha cuenda tandihi cha cuví. Vatyí ican ihya cuví cha cuñí Nyoo cha sacuvi yo cha cuví yo ñu chinó iñi chi ra Cristo Jesús.

¹⁹Ma ndahva ndo ñuhu Tatyí Ii cha nyaá aña ndo. ²⁰Ma cuacu nya ndo tuhun Nyoo cha cahán noo ra cahán tuhun chahá Nyoo. ²¹Tiin cuenda ndo tandihi cha cahán ra. Ta naquehen ndo cha vaha. ²²Cuachiyo ndo nuu tandihi cha quiñi caa.

²³Ta maa Nyoo ra iyó cha taxi ri chii, na sanduvii ca ra aña ndo tacuhva vatyí iin ri chi maa ra nacuhva cuenda ndo chi ndo. Ta na cocumi ra aña ndo ta cha chiñi tuñi ndo ta coño ñuhu ndo tacuhva vatyí ma coo ca cuatyí ndo quivi quichi tucu Sutu Mañi yo Jesucristo. ²⁴Ra cha nacachi chi ndo, cuví cunyeec iñi yo chi ra, vatyí maa ra cusacuvi ra tandihi maa ihya.

Nu ndihi cahan ra Pablo ta chahá ra nocumi chi ñu

²⁵Yañi, cacan tahvi ndo cha cuenda ndi.

²⁶Ta nacuhva ndo nocumi chi tandihi yañi yo cuenda Nyoo.

²⁷Tyatyíñé chi ndo chihin ndusu yuhu Sutu Mañi yo vatyí sacuahua ndo carta ihya nuu tandihi tahan yo cuenda Nyoo.

²⁸Ta na nasoco Sutu Mañi yo Jesucristo chi ndo. Ta na cuví chi tyicuan caa.